

摘藻堂四庫全書薈要

集部

欽定四庫全書薈要

集部

丹淵集卷二十

五至
九

詳校官助教臣常循



欽定四庫全書薈要卷一萬四千八百十三

集部

丹淵集卷二十五

宋 文同 撰



御賜飛白書序

仁宗皇帝飛白書乃聖人不可窮之大藝而無所擬之
絕學者也法傳之於天義授之於神淵情睿思下寓毫
墨揮灑變動函負藏畜齊陰陽之功合造化之巧宜乎

世人莫得窺其至精極妙之端涯者已若夫皇居奧瑒
貴室珎刻有容摹肖時亦飄墮其能於此以幸而獲之
者自將別為秘衷盡略他玩流畀後嗣傳于無極而況
密繇嚴從躬被寵錫將宜何如以奉其休榮者哉嘉祐
七年冬十二月戊申帝名侍臣二十有八人觀書于龍
圖天章閣又幸寶文閣是日上親御寶甯縱寫華楮韶
璫遞薦簪笏環視雲飛霞散之狀龍蟠鳳矯之勢震聳
驚眩流動衆目既而遂命以書分賜左右太子賓客掌

公禹錫時預此集乃蒙帝子之殊渥焉懷歸有光展對
猶濕觀其點分璽角下壓秦寶畫立圭植高掩周瑞仰
惟祥符之書氏陽之詔始可相與配其瓌麗而並其崇
嚴者歟熙寧五年十月其孫文紀為陵州貴平縣令襲
衍複櫝載以臨治願將刊鏤布示于遠謀奉堅琰留寘
佛廟見求短引以著其下懿哉侈君之賜揚祖之美乃
文紀為人臣子之道於是乎至矣故為題此初八日謹

序

拈古頌序

甚哉物之勝于人也久矣萬利舞于前其心未嘗不艷然願得悉厭於己者所欲一動厥本遂失而不可求既爾將何護持而復能固之者邪彼根種鈍下迷謬惛塞入類既淺餘習未斷者故不足與道此嗟夫世之銜智巧挾奸妄假名教冒資級養己謂無輩視衆若不覲者尚亦睢盱惘敵不自省覺其神已為有力者奪去淪虛浮空餘止腐殼猶務以氣自侈變改形狀標立高遠誇

穉惑庸殊未知一息絕續百骸附紵則隨業散墮灑隸

羣趣沈幽沒冥無可洗脫奈何日日戴此重障了不明
悟此尤為最可憐者也嗚呼幻美溺人之深也如此其
有能于其中視之謂非己之常所能有故不仞其毒若
水之不能濡膏之不能塗者間有人焉資政殿大學士
趙公以台鼎之重再尹于蜀蜀之人三十年中凡五見
公矣求公之迹終未能得或曰公之位既愈高而其色
若愈下謙靜恬懿無一易德者何耶曰是無他也修真

達元總了妄法物有不能勝之者矣所以常據三旌之
榮饗萬鍾之厚固如飄風值劍暫有一吹彼又豈能轉
之如俳兒顛媪執綸曳俏俛仰顛倒諠訥伏罷一由於
他人所役邪公既以無事為治其下亦各以無事安其
職化既成矣因萃會古人禪門語錄之深隱者拈而頌
之凡百篇揭月昏衢擊霆奧峭瞽者瞶者悉使覺知仁
人之言所利信溥一得永得公之志歟嘉祐紀禪師出
入公之門下香山如滿從白傳之遊圭峯宗密接裴相

之論得公所述願布行之寫鏤云初屬予為序因為道公之髣髴云時熙寧七年甲寅五月戊子日謹序

射中金錢詩序

學以正治心心以明養神神以妙應物是三者常相為用然後始能就乎所致之事蓋發乎其內而不失其成于外者繇素具此爾古之君子於射事尤所重擇侯選士莫不先之豈非謂其善知夫此理者歟提刑度支張公文章政事之外弓矢之學號為精絕求之縉紳實鮮

其類近嘗以金錢置之畫帖之上以壓其的用明其中之審與僚友競勝約先取以為樂公徐立諦視一發而遂獲之正投其虛鏃若手貫坐客斂色相拱而顧左右驚聳都人歎詫皆曰昔人以楊葉街已戟支伏衆者既大且近何足夸侈較公之善彼有餘拙公因作詩以志其事大尹而下咸屬和焉馳寄於同使序其略同曰世常謂夫射而能居所中之多者豈天性之本然在乎習之之久而後能也如志不自懈日事於其中無賢不肖

者一皆底乎其善矣豈他術耶噫非也是不知夫所謂
三者常相為用之理也彼知之者則不然取於精微付
之於手指之間省度而釋惟意所在未有不如其所欲
者矣齊工之於削輪郢匠之于斲堊與公之于今日之
事其道一也彼習之之久而能之者末矣哉熙寧六年
正月甲子謹序

種柳詩序

樂蟠地切邊其土燥澀硃礪雖春陽震憤剖發以導仁

氣亦疎散不演潤凡草樹託殖生意結結無人許長大
柯幹局然皮葉磔然抱節起癭不中材用豈和理近戎
落不霑浹抑西北性慘冽舄鹵與中州相絕至是耶楊
君灝巨川為令之明年暇日乘高窺臨笑此童禿曰宜
物之術人常與天地相比儼寧有施力顓致不可歟遂
種柳殆千根表絡諸道既自指閱各任其地闌迺灌浸
期以必活生脉通定一無殫者春條森森夏陰團團禽
弄蜩喝薈翳蕃茂於是彼人乃能識榮落以記時節行

者得休蔭無懼暘之爾變此川谷一若關輔巨川為政之大抵也乃作三詩記其事且欲俾後人相增成和者連章以至大軸巨川携入都下示余屬以序予曰事有利用求成於本無或不謂為難既成而嗣守之能不毀乃難矣盖人皆喜善自己出若名于他則萬計沮礙無少假貸者十常八九今巨川營此亦已勤矣來者能為撫摩而不樵薪之是亦賢君子之所為也詩將刻石於縣故余因以告後人云嘉祐庚子人日安靜文同序

賞梅唱和詩序

蜀之梅與海棠在衆蘂中最為高第他雖號有處殊瑣
陋孱瘠苦不可與為類者然海棠用冶麗妖富偏擅民
家取悅羣目無所遴擇梅獨以靜艷寒香占深林出幽
境當萬木未競華侈之時寥然孤芳閑澹簡潔重為恬
爽清曠之士之所矜賞故其第又自高也成都鈐轄東
衙園有素芳亭亭下有梅因名之慶歷中四方館使太
原王公護兵此邦是花正穠盛公命府尹程公而下七

人飲亭上第賦詩道其美石刻存焉後二十年太原公
之子道恭醇之用閣門使繼領此職其花依然尚如當
時之繁醇之復會其帥龍圖趙公抃閱道運使史館榮
公諱仲思同僚左藏武侯永孚及之運判職方霍侯交
敦誠於此讌集而又詩之語精意新聯照互映落墨未
燥衆吻爭習他日醇之錄以示同俾載厥事同曰異乎
哉彼梅者生于深崑邃谷之中又居西南絕遠僻陋之
國幸一得其所託遂為王公大人所愛惜而詠歌之以

傳乎無窮信夫天之生物滿盈于地中者徒芸芸耳豈能令之各善効其所負以取貴於一時耶蓋須待人而然後其名始有所成矣噫果如是則成之之力其勝愈於生之者耶一人之功殆高茲天耶同嘗於此為識者議之因序賞梅唱和詩故復云

楞蒲格序

李習之有五木經余嘗愛其敘所以為楞蒲之用者始末皆具然其戲最古世之人罕有能作之者故曰木曰

馬曰闔曰矢之類雕鏤彩飾短長鉅細曾莫識其制度
矣忠牧夏公守幽暇日出其家所藏先帝之賜者為其
僚屬講而行之於是盡曉習之之說也如此獨所異者
盧白雉犢開塞塔禿擲梟之外復加進退二采蓋使其
投無一或虛者焉又以禿為黑以梟為雞者疑語近爾
按馬融張華皆云老子入胡為此戲楚辭有呼白之語
周史載擲盧之事臧質劉毅何尚之高光宗之徒皆以
是而立善名也乃知士君子者亦無害留意于此彼王

戎王洪之墨黷鮑泉蕭望之泥嗜掠惡取禍固宜所鄙
焉嘉祐二年丁酉仲冬月十有三日新平官舍序

費先生詩集序

嘉祐癸卯春東平先生以古律五七言詩共六帙因其
甥朱景副書為示且屬余以序置其首余熟讀者累日
甚愛之余居常敢言唐人風調涉五代衰季已淪委而
不振及見先生之所為信遺音餘響久浮大空至治世
而復下今又軋然發于先生之筆舌爾按先生閬中人

少舉進士自勝冠走四方游名公鉅卿之門命既不偶
退返林壑盡諱其他能而一從事于此凡四十年探深
摘幽愈老益工大抵氣和平而意精新使人嗜之而不
厭也近世文士以篇什自名者甚衆如使先生之言雜
行于其中彼將左右顧揖相推以為先余恐先生得所
讓者固多傲然而獨居其前矣是可傳布於天下也

郭令送行詩序

汾陽郭君以成都府節度推官治永泰既二年凡內外

職事官得以言舉善於為政者共若干人以狀稱其治
其將代也凡遠近士大夫喜以詩章道人之美者共若
干人以詩贈其行大抵君之為令之術以廉以恕以不
自懈以終始之若一也故吏不得肆其暴而民皆曰是
未嘗擾於我者如是安得稱其治者不交章而贈其行
者不累篇耶其詩君次第為一編持以示余俾余題其
首將布之余為之云云

丹淵集卷二十五

欽定四庫全書薈要卷一萬四千八百十四

集部

丹淵集卷二十六

宋 文同 撰

序

送趙大資再任成都府詩序

上五年秋七月丞相以成都守臣當更其所以宜往者
名氏陳于上前曰是其職序才業皆可以稱其任惟上
之所擇者上凝神久之且曰今海內之蕃域號為至重

者舉莫若吾之全蜀壤土衍沃民俗豐夥外之則八國
種落賴之以綏輯內之則四道郡邑倚之以康靖得人
而重固異他所須智畧沈辨威惠肅給厭興論之所與
慰遐氓之所欲者始為其人矣我有耆哲宛在東土是
嘗以仁愛明恕撫吾西南之民故其民懷服其信厚逮
今未聞有輒敢一日忘去者此將煩之再蒞于彼其謂
往制無或循襲丞相奏被上旨乃曰聖慮所及度越常
議選委良帥以遺井絡遠人蒙慶不勝至幸於是以資

政殿大學士召公於營丘大旆過國詔趣見上衆悉謂
公輔臣必以遠解既對便坐獨奉天語雍容啓問移漏
累刻惟以願得亟裝出都門并驛臨治以副上之所以
待下之意訖不以私請自免以圖便安遂行上褒嘉之
馳使勞諭眷委之厚無與為較先是公二紀之中四臨
於蜀蜀人既聞公來男誨於道女謹於竈皆曰我之七
筋安於食而枕第樂於寢者不圖今日復因於我公矣
公既至簡條目去苛暴刷滌梗垢磨盪昏瞽羣疑革而

水消大擾息而波澄未逾月而梁岷之下晏然已為樂國矣同昔者嘗聞之於公曰夫感物患乎有心有心則接於物也泥而不博臨理貴乎無欲無欲則燭於理也明而不闇泯諸妄慮照以正見則天下之治安有所謂齟齬而難致者哉蓋公素事於此以為身術故入居嵒廟出殿巨屏曾不以內外為輕重而一以行其所無事者為政治之本凡取知於君而獲愛於民者具將由此者歟同常欲有所論譔以紀公之休懿會赴官興元道

出門下公因授以送行詩一篇俾同為之序同乃述上
之所以復用公於蜀與公之所以得蜀人之歡心者題
其篇首詩自韓魏公而下凡若干章云熙寧六年上元
日謹序

送張學士知嘉州序

熙寧六年秋吾友張益孺自太常禮院求為嘉州既得
或謂余曰益孺少有才名向嘗以辭章冠國學多士遂
優中科等自名試入館凡若干年其踐歷亦已深矣方

朝廷急用賢者之時如益孺不補外被寵擢列華貫旦
暮期爾何遽求去以自緩耶余曰豈具然哉夫士之所
以恃而立於世者固在乎知此道而已矣命既存乎我
其所以用舍之者繫人之能否爾惟能常安於中以俟
時之所進退自信乃篤也或撓已以求合之雖上竊寵
榮以夸耀末俗其為賢者一付清議昧然已為賤丈夫
矣益孺修正端潔治已有法度今欲使為賤丈夫者之
行其宥邪況漢嘉西南之美郡益孺以二千石於此侍

嚴君旦夕之膳具為人子豈不榮且樂歟以此較彼益孺所獲其少歟彼將奚為哉初出都朝中士大夫亦以益孺之行為可賀者皆以詩餞之凡若干首益孺視事之明日即走書興元求余為之序將刻之石故為言此八年上元甚美堂書

送朱郎中詩序

熙寧三年庚戌三月癸丑同自蜀還臺宿臨潼華清道館朱康叔引名見訪康叔昔守閬中以治稱同未嘗識

之而嘗相通書也遇於此尤自喜問其所以西行之因
康叔欲然謂同曰不肖不幸少與母氏相失及今五十
年矣自省事始能有告之者然終不能得知其所以
歸逮冠游宦四方雖身居于此而其心未始輒少時不
營營於彼期於母氏之見也去歲在廣德一日若有所
感者遂解官決欲走天下冀萬一或遇之當先出函谷
上雍宜有得道其迹彷彿殊可信乃斷葷血食刺臂鏤
板寫摹佛書輦散於所經由道區區祈徹母氏之聽聞

至此累日又言儻在金州者明日且復如南矣言罷涕
泣嗚嗚是時同亦新免削杖聞之摧咽不自勝起撫康
叔曰君尚有母求繫我無之奈何相與歔歔久之夜分
散去同輾轉至曉不得寐因口占百字詩送康叔謂其
精愿如此不獲之神理昧矣明朝上馬授之而別至京
未幾聞長安大尹錢公明逸表康叔於朝曰朱某擯棄
官本繇尋其母今既得之馮翊矣宜還之舊秩且褒寵
之以勸激天下當時士大夫相逢遇謹然駭異稱嘆謂

非世之所有在昔亦無幾矣其秋康叔侍太夫人入都
都人逐板輿前後擁觀至所居閭巷談說抃蹈嗟咨至
有感慨墮淚而不能自語者如是閱月而後已上嘉賞
特召見復其官又封賜其母長安縣太君康叔請願且
倅河中庶近母前所在慰之詔許於是好事者爭賦詩
以贈行凡若干篇五年同守陵州康叔之子維縣尉瞻
之遣使致書授之大軸則前此詩也且曰大人昔求祖
母時其端涯絕未知而公與之詩謂必得後果然瞻之

將欲益以諸公所為刻傳之幸公復序之使明白同既
已高康叔之懿行又愛其子能章大其父之令名故為
之云云以警當世之薄俗以貽史氏之願作佳傳者康
叔名壽昌今為駕部郎中壬子中元平雲閣序

送敏行無演序

余於莊周書讀之有年矣愛其善騁高辯一盡乎天下
事物有名相者性分之理輒嘗謂曰是雖有好為橫議
之士於此固亦無地可以容其言矣後得僧肇法師四

絕論因悟不遷不真之旨與無知無名之義漸簡邪惑
直領妙慧回視向之所嗜逍遙齊物之說何其說說者
哉具有高不可躡而深不可汲者竊常患之講師無演
自成都來為余設滅緣之梯引除妄之綆使余旁羊恣
肆造詣無極俛仰一息空色皆盡斯無演之力於余大
矣顧余所獲者何等物耶一日無演忽語余以西還之
期挽緘以留屢不能得遂書此以贈別且自見也熙寧
六年癸丑季冬甲申書

送通判張總之都官赴闕序

服道之深者其心必渾融淵虛寬廓夷易秉負確固動
不回辟據通顯處屈約視之絜然弗汨乎中安所自存
以充其元焉近世養士不以三代之法成就之使其知
此術者甚鮮同嘗用是以考質士大夫之所為謂清河
張侯總之者斯人歟總之仁以治己誠以接物自登科
凡三十年而官不過員外郎位才止治中從事不競勢
不倚俗外泊而內靜色恬而氣和其辯論正而達其文

章博而粹無躁志無懟語愉如也同往年拜總之於成
都及來南幽復得預總之執事反覆叅視無有缺誠
哉士者之刑範而吏者之文墨耳今解秩歸闕彼能以
賢才而報國者云誰如欲為朝廷求所以有益於時者
用總之則名知人矣

道士袁惟正字行之序

道士袁君閬中人也其所住觀與余永泰山居相距才
百里予昔在鄉里時已聞袁君能用六十四卦推五行

配六神使七十二煞言人禍福已發未兆之應一一若目見然竟未識袁君之面也後余典校中秘書幸與士大夫遊近日往往有為余言道士自蜀來者善以文象消息休咎嘗與某人占某事某事約時指日無不如其說郭景純管公明之流也予雖舊聞袁君之術甚精而未敢以是必為袁君以對之爾暇日納涼於城南道宇有道士出西廡下高顴廣額狀貌怪偉肅予以入坐堂上予因問其所從來曰來自蜀問何以居此曰往年嘗

以占驗得權貴人意遂喜以紫服奏我館我於是問其術誰師而如此曰自居蜀時已得異人授秘記後復走天下東西南北殆遍聞某所有某人善此術者雖數千里必往洛焉質吾所學而遂無疑凡今所言若牛办虬鏃見則洞然矣問其姓曰袁氏乃予昔在鄉里時所聞與近日士大夫為予言者袁君是矣遂與之往還一日詣予言諸友皆以字相稱我獨無敢以字請予曰惟正者君名歟夫正者道之所由立也凡在天地間涉形迹

該事為者莫不保之以全其用者也或失之則傾側邪
辟龐雜乖盭於不善無不至矣今君方以是術有名于
時為人信嚮如能正以行之守之以固不為利欲撓其
心若莊遵季主之所為君之道高矣宜以行之為字表
君跽而言曰方外之人未聞此語幸而君子字我又因
而規我敢不佩服以終世書以贈之嘉祐五年庚子元
日謹序

夏侑字德卿序

古者諸侯有德天子必賞之以樂有樂必飾之以舞有舞必差之以行綴其制蓋自六佾而下佾列也列行綴也夫欲識治民之勞逸者必以行綴遠近而考察焉故曰觀其舞知其德會稽夏君生於勲貴之家能不以驕蹇自汚而學問無厭其名侑有意歟其將暴厥所修以進於位而為生民之利歟其欲謀致華顯光大以祈有德者之賞歟是必恥其行道也不充而受賜也不侈爾問字於余余以德卿呼之緣其義而就其業也君能勉

之歟如能使吾言不費則君之見報者厚矣

丹淵集卷二十六

欽定四庫全書薈要卷一萬四千八百十五

集部

丹淵集卷二十七

宋 文同 撰

表

賀斬儂智高表

臣某言伏覩進奏院報狀已斬儂智高訖蕩除妖氛天地以肅翦撲兇醜寰瀛甚安凡在聽聞孰不懽快臣某誠慶誠抃伏惟皇帝陛下機與神密道如天高威靈風

雷慈惠雲雨國以內外盡陶醇醲物之生成皆荷覆育
宜無獷悍之俗上黷寬仁之尊而儂智高者生於窮涯
稟者蓋氣善教不率狂謀自將嘯聚九真之徒跳梁五
管之地尾掉蜂蝎脣張豺狼驚驅我民人搖撼我州邑
陛下震動英武鋪宣睿謀暫迂材臣畧舉銳士大號鎮
壓羣頑遁逃奔流他方寄託微命然且質其親愛許以
來馴何梟性之不移但狸蹤之自遠憶彼蕃服憚于皇
家姦而弗容衆所共憤乃盡誅其殘孽仍遠告於中區

掀揚疇靈爰刈繁穢是宜兼以母弟尸諸市朝大正嚴
科了無遺種傳命下諭有生咸知四夷之魂盡飛萬國
之手皆舞茲焉盪滅永矣恬寧臣限守邊州不獲奔詣
闕庭臣無任瞻天望聖喜抃激切之至謹奉表稱賀以
聞

賀聖體康復表

臣某言今日本州進奏官任中立狀報聖體康復於
二月二十三日御延和殿親見羣臣者嚮以皇躬忽嬰

美疾勿藥有喜大易載無妄之文自得為功內經明適
性之說仰聆安豫俯積欣愉臣某誠歡誠忭頓首頓首
恭惟皇帝陛下乘熙明之期荷富盛之業抑畏萬務焦
勞一心無逸豫以為懷有憂勤而自戒懍乎居海寓之
大惕若奉祖宗之休乃身冰淵所事宵旰屬履三陽之
候偶差六辨之和而九廟護持萬靈綏佑僅逾旬浹已
復恬寧親臨中宸燕見庶列氛祲蕩滌天地所以廓清
靈翳歛藏日月所以光耀輿情既悉黨議相驩况今遐

邇又安左右賢哲願裁思慮游神清燕之深庶召嘉神
享國龐鴻之永臣幸逢聖旦忝受邦恩限此守藩無由
詣闕臣無任瞻天望聖喜忭激切之至謹奉表稱賀以
聞

賀乾元節表

臣某言臣切以統當大火聖人乘而上臨月在正陽真
主稟而下降衆宇遇乎嘉節黎庶陶乎盛時和聲激揚
協氣充衍臣某誠歡誠抃頓首頓首伏惟皇帝陛下合

天地之粹憑祖宗之休誕靈中區撫衆率土纘世而治
歷年以深仁恩滂洋德教醲厚顧羣萌常願於崇報盡
衆美難酬於極尊唯逢慶辰乃祝睿筭巍然而峙者山
嶽浩然而流者江河齊同久長無所窮盡臣被惠累世
叨榮遠藩限守符章阻陪班列遙望天闕臣無任頌神
禱聖踊躍忭蹈之至謹奉表稱賀以聞

賀恭謝禮畢表

臣某言今月十二日大慶殿恭謝禮畢大赦天下者講

盛大之儀三靈集祐沛厖鴻之澤萬寓蒙休鉤隱歡聲
之馳熏烝和氣之發浩若九土熙然一春臣某誠歡誠
忭頓首頓首伏惟皇帝陛下紹會千齡之期垂臨百世
之統崇立禮樂而標于永古燁明制度而盛于前朝念
天地生成之深必謹精純之饗惟祖宗功德之茂當崇
配侑之文爰諏季商遂就吉卯具稌容於廣殿協大報
于丘邦闕浸融國典尤備顧惟已事咨此推貺恩思與
元元之繁共均簡簡之况號令迅而風下仁慈滂而雨

流臣幸遇昌辰屬臨遠郡即時分告縣邑輯呼軍民宣
揚聖謨曉諭上德傾帑藏之厚賜挺狴牢之衆辜坊歌
巷謠耄舞稚蹈悉能祝陛下享無疆之壽願陛下隆不
拔之基羣口皆然累日後已臣限以職事不獲陪賀闕
廷無任喜忭激切之至謹奉表稱賀以聞

賀明堂禮畢表

臣某言伏覩今月二十日赦書到州祀明堂禮畢大赦
天下臣已於當時呼集官吏軍民宣讀曉諭仍下所屬

縣鎮施行訖者禮行路寢講昭曠之文詔下中區需汪
洋之澤頌聲飽滿叶氣熏烝天子修大饗之儀史臣書
盛德之事一朝鉅典萬世洪猷臣具誠歡誠忭頓首頓
首伏惟皇帝陛下纂嗣慶基修崇徽屋度越虞華之孝
增高商乙之仁以謂展三載之精禋存五聖之舊矩顧
惟仁廟之世嘗奉合宮之祠念將循仍俾罔譌墜以示
降神之重以彰配帝之嚴精虔致誠靖謚終事將均禧
於四海爰發號於九闕盪垢滌瑕赦過宥罪陳租久債

潛烈幽功咸在此時盡蒙其惠乾坤泰定日月清明諸
產昭蘇太蘇充決臣方當盛旦出守遐州雖不能陪在
位以駿奔實亦幸與斯民而宣布臣無任瞻天望聖歡
忭踊躍激切屏營之至謹奉表稱賀以聞

賀同天節表

臣某言伏以月正乎陽體六爻之剛健日盈其數具五
位之生成聖人所以出而為乎大君上帝所以命而撫
乎下土嘉辰在旦綿寓皆歡臣某誠慶誠抃頓首頓首

恭惟皇帝陛下文備堯明智兼湯勇無治不究有為必
成自履廣居益新大業立帝王之紀將欲度三皇之先
齊天地之休豈止饗億年之久常臨大寶永覆羣生臣
久去明廷叨居遠服屬榮采組是為有守之官仰薦壽
觴徒祝無涯之筭臣無任瞻天仰聖激切屏營之至謹
奉表稱賀以聞

賀同天節表

臣某言臣聞天之所以生聖人蓋表章於後世國之所

以得明主期保佑於斯民乃宋重熙惟皇嗣守在傳而
盛德天縱居尊而睿謨日新故得荒忽之遐辟陋之衆
泳游帝渥重灼皇明逢慶節以在茲載歡聲而無已臣
某誠歡誠忭頓首頓首伏惟皇帝陛下繼堪輿之大紹
宗祏之休上帝鑒觀羣靈擁衛是故月臨于己六陽儲
純粹之精日浹於旬五緯合生成之數誕彌聖質對越
昌期所以靜淵疏通剛健中正齊堯等禹軼漢踰唐文
淳武嚴惠敏威肅雖然舉四海之內願報於帝力極萬

寶之重豈酬於化功惟於降聖之辰共祝同天之壽臣
幸陞仕版竊玷儒林屬紆郡紱於遐垠阻綴朝裾於廣
域願言致頌與世同辭臣無任瞻天仰聖激切屏營之
至謹奉表稱賀以聞

賀正旦表

臣某言天道運四時之功惟春曰首王者布萬方之政
以歲為端太和發揚庶彙蕃蕪羣靈儲甚盛之祉兆姓
禱無窮之休至尊乘之諸福備矣臣某誠歡誠抃頓首

頓首伏惟皇帝陛下稟五精之粹會一氣之元襲九廟
之丕祥荷八殞之大統日躋乃聖天祐其仁諒臨御於
三朝固昌延於億載臣方當盛旦出領遐州阻陪漢會
之朝徒祝堯封之壽遙瞻象闕限守魚符無任望天祝
聖激切屏營之至謹奉表稱賀以聞

賀冬至表

臣某言天地既復示一陽生物之端帝王其乘饗萬壽
集躬之慶惟是撫內外之臣庶於以禱邦家之福禧盛

德溥將綿區永賴臣某誠歡誠忭頓首頓首伏惟皇帝
陛下荷堪輿之寶錄承宗祏之神基睿謨益新聖度愈
遠皇明徹乎幽隱惠澤浸乎洪纖遇此昌辰備諸景貺
臣蒙恩守郡待罪踰年拜綵仗之前阻聯華貫望喬雲
之下徒想清光臣無任瞻天仰聖激切屏營之至謹奉
表稱賀以聞

為楊侍讀謝官表

臣某言才短而治劇務或解去則甚安學荒而為近臣

若忝冒則誠愧讓避不獲兢危以居臣某誠惶誠感頓
首頓首竊念臣素無它能本自孤立天授介狹世名拙
方偶塵宦遊誤應官使約已以道豈敢謀身而自營納
名於忠常慙報國之未効命與羈躓職多曠隳惟賴聖
神之知屢寬罷軟之責嚮蒙拔拭使辦要煩召至外臺
入陪會省簿領倥偬財賦浩穰顧區撥以非能慮譴斥
而不暇止幸滿歲將從外官甘終散僚分絕榮路伏遇
皇帝陛下黼飾治道興崇化原簡求多聞登采衆善演

導聖智鋪宣神猷天閣之嚴署才臣而訪問書殿之秘
列儒官而講陳此之清聯當以碩望況今耆雋在列吉
髦盈庭宜親通才用副嘉選或下授於孱鄙實有幸於
選掄然臣少雖從師久已廢業性弗解而自蔽心不磨
而愈昏古今之宜究極而未至典籍之奧討論而未精
將何以上補宸聰遠荅天眷重煩綸綍難避於新恩退
伏謙絀復尋於舊學庶盡一節少裨萬分臣無任感荷
慚恐激切屏營之至謹奉表稱謝以聞

丹淵集卷二十七

欽定四庫全書薈要卷一萬四千八百十六

集部

丹淵集卷二十八

宋 文同 撰

表

謝就差知興元府表

臣某言今月二十日進奏院遞到勅牒一道伏蒙聖慈以臣陳乞特除授臣知興元府仍放朝辭者便私之請輒昧死以上聞從欲之仁遽推恩而下及臣何為者幸

至是哉舉千里之大而使之撫綏顧一介之輕而敢不
勤瘁望過心悸感深涕流臣某誠惶誠恐頓首頓首念
臣誤緣科名竊進館閣是正譌謬學問淺而未精講磨
本元才識短而多泥居中無補請外尤頻嚮蒙朝廷俾
守仁壽當奉行條詔之始固勿憚簿書之勞踰年於茲
庶事頗集殆將滿歲當趣還朝因念骨肉衆多道途緬
邈加有為累之婚嫁殊無可仰之耕桑何所賣琅邪之
田徒爾索長安之米以再求僻郡少緩私門豈謂伏遇

皇帝陛下照以天光函之海量俯矜愚妄特逭誅夷亟
下武都之書使紆南鄭之紱矧茲善地實曰鄰鄉川陸
寬平魚稻豐美顧惟多士有願往而不能豈爾賤臣或
陳請而遂得被恩若此圖報用何止俟交官即赴新治
誓盡么膚之一節庶酬汪濊之萬分但竭愚衷敢誣天
鑒臣無任感神荷聖忭蹈欣躍激切屏營之至謹奉表
稱謝以聞

興元府謝上任表

臣某言伏蒙聖慈就差臣知興元軍府事臣已於三月十八日上任訖前俾為州愧無善狀今叨易地竊荷優恩退思溢滿之材薦霑汪濊之澤揆具不稱常爾為虞臣某誠惶誠感頓首頓首伏念臣稟才不高涉學甚淺偶塵仕路輒玷儒林曾無可觀謬被朝紱獨有甚幸屢親藩條方解組於隆山之陽復移麾於漢水之上逾旬至止盡室安然竊觀風物之宜實與鄉關之近庶事易輯羣情相通顧雖孱庸粗可臨蒞此蓋伏遇皇帝陛下

全大勝之德運無私之仁遂使孤生亦膺遠寄臣謹當竭已思慮求民隱徼諭陛下愛人之心行陛下考古之政不敢立異自徼虛名惟知盡忠庶酬大惠朝夕於是死生以之臣無任瞻天望聖激切屏營之至謹奉表稱謝以聞

洋州謝到任表

臣某言臣伏蒙聖恩就差臣知洋州軍州事已於十月十三日上任訖解麾漢水之陽卒無善狀剖竹洋川之

上重沐殊恩嚮露愚衷常虞慙責忽汚睿聽遽賜矜從
臣某誠惶誠感頓首頓首伏念臣生西南僻陋之邦本
草莽孤寒之士守章句之學曾未達於淵源登詞賦之
科幸且緣於階漸期行所願不負於官粗知廉恥立身
之大端素識忠義報國之名節以至四參郡事三佩守
符曾亡纖疵上抵明憲惟憂所得過分不敢別有妄營
止求便麾屢瀆嚴宸此蓋伏遇皇帝陛下憐其雖愚而
未至無狀許以堅請而尚令有為惟洋號曰小州在蜀

最稱善地所樂有江山之勝其養得魚稻之饒疆界甚
遠而民人樸淳牒訴不繁而獄犴希少比之前治事不
及於一分在於愚臣心實知其萬幸惟勤夙夜以布教
條事有未便則裁而及中民或不然則諭以循理誓殫
駑力仰荅鴻私臣無任感天荷聖激切屏營之至謹奉
表稱謝以聞

陵州謝上任表

臣某言臣伏奉勅差知陵州軍州事已於三月五日起

任訖竊以陵州在崎嶇山谷之中城壘邑屋與巒嶺澗
壑相為上下所領縣四戶口裁三萬稅錢止千三百緡
租不滿萬石土田瘠鹵民頗善耕稼然其性椎質各守
護本業不意作訴訟為之長吏者但能奉諭朝廷所以
愛養遠民之意外惟輯簿書趣期會而已如是亦可謂
之善辦夫職業者而臣比時輒當斯任豈不為至幸哉
臣誠喜誠懼頓首頓首伏念臣顓蒙淺陋素無才術但
偶以辭律獲中科選既而用此復列館閣惟是稟賦孱

薄動涉艱梗凡自近歲已來愈罹患難連綿家禍幾濱
於死纔得舊官復以罪失臣常自念生平蹤跡如此而
欲久居圖書之府重費太官之膳苟福不稱是必轉為
咎悔臣嚮者所以懇求補外願以所學施於有政冀獲
萬一上圖補報頻煩千叩不避誅戮伏蒙皇帝陛下天
地父母涵容養育察見幽隱遂賜矜恤不惜千里遣臣
試守此州最為僻陋殊無將迎之勞加復其民素號易
治臣之得此誠極優幸若夫均賦稅簡徭役撫惇獨明

寬滯臣旦夕區區所以留意於其間者願持此効仰答
恩賜策駕礪鈍不知止息臣無任喜懼交集誠悃激切
之至謹奉表稱謝以聞

謝復官表

臣某言某今月一日進奏院遞到勅牒官誥各一道伏
蒙聖恩以祀明堂禮畢特授臣尚書祠部員外郎者議
禮不當奪官至輕固宜終身不復舊秩豈謂今日再蒙
新恩緣聖主講右个之洪儀致愚臣歸左曹之末屬被

命忤躍撫躬憂惶臣某誠惶誠感頓首頓首伏念臣出身寒微受性迂闊偶從鄉版獲隸朝紳迹甚羈孤勢無援助加以讀書不能究其根本臨事所以失其源流當獲罪之時人皆謂其末減在布慶之後天難酬其大均此蓋伏遇皇帝陛下執道之公御臣以一昔之行罰蓋懲其疏略之非今也推恩式示其昭洒之用臣愈當循省敢怠操修惟勤討論庶備驅使誓殫眇節圖報鴻私臣無任感恩荷德喜懼交集之至謹奉表稱謝以聞

謝轉官表

臣某言九月十六日進奏院遞到勅牒官誥各一道伏蒙聖慈特授臣度支員外郎仍加輕車都尉者錄此微勤進之榮秩念無最績徒被優恩欽閱訓辭交橫感涕自顧漂零之賤常霑優渥之華臣某誠惶誠感頓首頓首伏乞臣出西南僻陋之邦本田壠孤寒之士偶緣文藝誤中科名二紀歷於仕途一生困於末路若絕徑之弊轍屢挽而莫前如隕岸之積沙將通而輒塞所以為

太常博士自首至尾也僅十年轉祠部員郎既得復失也凡三次蹇難若此窮薄使然退常自循本因無扶用何才業稱是寵靈得居班聯已過涯分屬展年之甫滿會奏課以當遷伏遇皇帝陛下發天地之德而溥生開日月之光而徧照枯根腐柢煦以陽和側隙窮涯破其昏鄙是使吏闡之叢品亦升計省之中行臣敢不恪奉官箴究行民政誓殫愚効仰報鴻私臣無任瞻天望聖激切屏營之至謹奉表稱謝以聞

謝賜厯日表

熙寧五年

臣某言本州進奏院遞到詔書一道伏蒙聖恩賜臣熙寧五年厯日一卷者切以王者求天之端用正厥事聖人合時之序乃繼其神是故凡當改歲之初必布授人之法以頒宣於列郡以揭示於羣氓使之奉行罔或遺廢臣某誠惶誠感頓首頓首伏惟皇帝陛下仰規洪宰俯育黎元深詔疇人精窮統母撰定歲律編為國章賜諸守土之臣諭彼食毛之俗使之知氣朔之早晚識功

緒之後先順本陰陽調為玉燭臣謹當被受敢怠施行
捧戴之初忤躍無已臣無任佩恩服德激切屏營之至
謹奉表稱謝以聞

謝賜歷日表

熙寧七年

臣某言都進奏院遞到宣一道伏蒙聖恩賜臣熙寧七
年歷日一卷者竊以天道運動而生時所以合靈文於
璿蓋王者遵承而布政所以定寶歷於清臺步日月盈
縮之躔均節候早晚之序以示萬寓以明兆民付諸守

臣謹是彝憲臣某誠惶誠感頓首頓首伏惟皇帝陛下
摠元立極執象求端御六氣以宣和撫五辰而在宥於
是訂考靈曜之說正斗位以無差造攝提格之書成歲
功而有緒編研甚密推測尤精臣於此時寵被其賜謹
當仰虔君惠俯親農期俾遂嘉生庶迎協氣臣無任瞻
天荷聖激切屏營之至謹奉表稱謝以聞

謝賜厯日表

熙寧九年

臣某言今月十三日進奏院遞到宣一道賜臣熙寧九

年歷日一本者上天運至神均陰陽之氣而序成四立之功者謂之時聖人命有司推分至之度而編為一期之事者謂之歷大抵皆因萬民資用而立本蓋慮忽有一物過差而失宜故每於歲首而成書必布之諸夏而垂法君心溥愛民意交歡臣某誠惶誠感頓首頓首伏惟皇帝陛下體合道淵用符天宰謂庶類生生而有理當謹候於陽秋謂黎元泯泯而無知必先明於氣朔遂俾清臺而鈎校實如靈憲之精微是則卦氣効而無災

卷二十一
沴之虞月令正而合發歛之節盡躋庶俗皆底太和臣
幸守半符叨承中旨謹當宣布不敢廢違臣無任佩荷
恩詔喜忭激切之至謹奉表稱謝以聞

為林大卿轉官表

臣某言正月八日進奏院遞到詔勅牒各一道伏蒙聖
恩授臣光祿卿仍放朝謝者詔下九闕實從於簡顧職
通三義遽屬於孤平被寵有殊仄身無所臣某誠惶誠
感頓首頓首切念臣早編仕籍久玷榮階積處艱煩粗

傾庸悞不圖脅諂之賤自企公忠之為盡蒙宸襟深體
愚節用絕衆援進由上知出付巨藩入均會省權寄之
重者三路嘗備選求宦遊之貴者九卿屢叨除委上課
雖否取尤則微退念所蒙每虞不稱敢期省錄復用褒
遷此蓋伏遇皇帝陛下象天高明與日臨照覆露旁薄
光輝顯融顧惟衰孱亦在存錄念以久業加之至恩品
序清崇屬以領大官之任訓言溫厚勉其紹先子之休
拜命云初懞懷茲甚以何才効可荅深仁臣方佩守符

遠臨邊屏止能練輯羣武撫綏遐邇以赫揚陛下之威
靈以宣決陛下之慈愛竭臣短力緩主西憂盡已之謀
畢生以報臣無任感恩佩德激切屏營之至謹奉表稱
謝以聞

為夏宮苑邠州上任表

臣某言伏蒙聖恩就差知邠州已於十月四日到任訖
領戎轄於維陽愧無善狀易守麾於邠土遽沐殊恩拜
命之優省躬而畏臣某誠惶誠感頓首頓首切念臣材

甚梗鬱器非通閎徒以偶逢辰之榮叨延世之幸因玷
官簿遂塵使階凡名劇煩亦誤掄委然而宣罷輟之力
雖勉而不前慕殊尤之功以愚而莫致宜投散地尚畀
雄藩此蓋伏遇皇帝陛下大和浹人廣度容物禮遇先
臣之厚慶流弱嗣之深再使臨民用觀為政臣器雖至
淺心亦自明敢不履蹈氷淵佩服絕墨撫養百姓訓齊
三軍願竭涓埃之勤庶酬天地之造臣無任感天荷聖
喜懼交集之至謹奉表稱謝以聞

謝轉官表

臣某言今月二十五日進奏院遞到勅牒官告各一道
伏蒙聖恩授臣司封員外郎仍加上輕車都尉散官賜
如故者分三郡之符慙無後効考四年之績濫進前行
被命優華撫躬惶戢中謝伏念臣本生寒賤之族幸遇
明昌之辰官叨清曹職冒秘閣費廩祿已逾於二紀隸
朝紳亦預於五遷恥從他求榮自上賜此蓋伏遇皇帝
陛下廓大度以御世操兼術而取人是致庸虛復膺敘

轉敢不益循涯分更勵廉隅上堅報國之心下固立身
之節忠義大者死生以之臣無任銜恩荷德喜懼交集
之至謹奉表稱謝以聞

丹淵集卷二十八

欽定四庫全書薈要卷一萬四千八百十七集部

丹淵集卷二十九

宋 文同 撰

啟

謝吳龍圖啟

某啟近者伏蒙知府龍圖諫議為某發章薦於朝廷乞
召還書殿以備諮訪者聞命彷徨撫躬戰慄伏念某材
惟朽下性實枵疏稟之自然確不能變然而纔於為學

之始便識立身之端唾詈諂諛憎惡詭激惟嗜古人曰

仁義者飭諸已不隨世俗謂富貴者移於心所以自從
登科以至游宦二紀於此一節不回雖然官升朝省久
軌而難遷職隸館閣一置而不問中間累經患難固亦
自安困窮私念既無援助於當途常謂莫如退縮於散
地向竊請郡聊圖庇身豈謂孤迹之有依獲在穠陰之
所覆每自戒飭庶逃譏訶伏惟某官學洞聖賢之深器
懷公相之重臺諫風采至今凜然藩鎮威名所治肅若

其如好引後輩曲揚小才忘長醜於流離采下體於封
菲謂某自登門館已歷歲時知其亡它憐以甚眷今茲
守土復在提封考其効官之方參以行已之事雖亡善
狀可免嚴科遂抗薦章特形褒語蒙見輓之若是在論
酬而謂何謹當愈勵清修益勤素行所貴異日獲在洪
鈞之前不後它人亦預巧陶之末過此以往未知所裁
謹奉啟謝不宣謹啟

謝運判韓都官啟

某啟近者伏承某官特為某發狀保薦聞於朝廷者反
視諸已止如常人念無它才取重賢者聞命之始撫躬
若驚竊念某本出孤寒素無才譽自常審已不敢求人
獨於執事之門闌向在京師而出入所以南陽丞相嘗
為發章北門主人久與同事至蒙存錄尤恤單平豈期
今守於偏州復幸託居於大庇蓋藏其短已荷殊恩升
薦於朝甚出過望何於已而萬幸惟受眷於一門感發
於中言出不妄止勤薄効上答深知謹奉啟謝不宣謹

啟

謝運使韓少卿啟

某啟近者伏承運使少卿發狀論薦乞朝廷召某任使者顧此無狀聞之若驚將何營為可用報稱伏念某本無藝業偶竊科名復幸散材更塵文苑稟資鈍縵臨事迂疎用既無堪援亦甚寡然而恥謀優佚願試繁難向請外官蒙除此郡政多廢墮事徂因循凡謂綱條諸無件目加以地產豐夥俗習僭豪彊戾相高孤弱無告某

止能為明枉直聊正典章惟存至誠豈有它術伏遇運
使少卿選從中宸委付外臺旌別羣僚臨按一道猥收
蒙鄙曲為薦揚取困轅間奪燹竈下施之寶校飾以珍
徽俾騰長途使備雅樂存憐若此感激無涯惟務操修
庶酬知遇卑情無任佩荷深切之至謹奉啟稱謝不宣
謹啟

謝成都知府啟

某啟解麾漢水之陽愧無善狀剖竹洋川之上重沐殊

恩退惟謏薄之姿薦託醇醲之蔭已頒條教謹備箴規
切念某性本椎頑學無根據誤中太常之異等獲陪秘
府之英游然而蹤跡甚孤媒援絕寡常務以繩墨而勵已
豈暇學脂韋而事人衆皆矜之盡謂其不肖獨無愧者
自知其當然況其幸之已多於所請而常得矧茲刺史
之職任實曰難才惟是上官之保存方能免過此者伏
遇某官以高才與學而陞法從以奇謀妙畧而居要權
總鈴兩道之兵符提按諸城之吏瑣向嘗備吏已荷庇

饒今復為州又煩提教屬守符之所系伏竇祀以無由
跂引崇嚴下情無任喜懼交集之極謹奉啟謝不宣謹啟

謝中書啟

某啟郡易其名罷當還館詔俞所表許復為州從人欲
之便安何君恩之寬大重煩宰制竊負兢營某已於三
月二十八日到任上訖伏念某門地至寒資材甚淺宦
途最品儒館陳人學每強而不高命初稟而且薄從仕
二紀罹憂百端居嘗自知分蓋如此鄉因乞守於鄉近

曾未滿期而地遷既屬減休之員實虞轉徙之患遂陳
悃悃仰瀆朝廷敢期下貸徵求再蒙寵寄此蓋伏遇某
官以經術講大政以器識觀羣材輯和衆功製治元化
所以陶鈞之下無坯塏之差丈墨之前盡輪轅之適用
巧所及雖微必收故茲孱庸亦被掄委敢不飲食王事
寤寐政經對諸吏民之言諭以君相之意凡云釐正止
在矜寬庶知為國之仁少報代天之惠某無任感荷激
切之至謹奉啟謝不宣謹啟

謝文潞公啟

某頓首上季夏極熱伏惟樞密太師侍中台候萬福同
違離門館茲已逾年想望恩闕豈忘夢寐自顧寒賤之
品不敢非時奏記貴平掌縣令到州伏蒙侍中存錄孤
生特頒手誨丁寧告諭若語子姓奔騰浩蕩揮灑累幅
開緘之初勢欲飛騰伏誦數過暖如布帛出詭僚友盡
恨不為已物歸示妻孥皆云便是家寶台躔引照節室
生輝昔人有受細林之言而退書諸紳獲山陰之字而

別為一表豈與不肖今日所得相比擬哉佩服嘉貺榮望已足珠璣滿斗實輕此惠永言藏弇以傳世衍同無任忭蹈激切之至謹奉啟謝不宣謹啟

別紙

某出入門下殆三十年賦命薄淺牽挽不上侍中每怜孤蹇顧遇不替凡列左右溫慰如同一同所恨窘迫急於救贍不得居官輦下日趨恩屏得郡於此至為牢落山谷之中殊無氣味飲食之物藥劑之品悉仰它處速不

能得已過五十漸入衰病生平苦學自知無用閑方僻
所且冒祿食實亦自愧矣侍中常賜存卹敢此具道某
上覆

謝王尚書啟

某啟某近至幕府少謝尚書為辦東行之惠以某之散
冗以尚書之貴重其謁見接遇之禮止當一賜之坐一
召之食則其體宜矣而尚書厚自損抑絕去崖岸延引
勞問言貌溫悅遊騎燕席皆許參侍有所過慢一用恕

悉此尚書立德之隆取義之重為之而可也其如某之
負抱靜無所有使之將何以報尚書如是存眷者耶某
此者幸得試職文館尚書將旦夕召用歌勲頌業燁燿
尚書之休懿者某僅能為之是亦可以對今日所蒙之
萬分爾漸遠軒屏某無任瞻系激切之至謹奉啟謝干
浼威重伏增恐慄不宣謹啟

謝提刑謝司封啟

某啟某近者竊聞某官以某備吏於所部之下怜其亡

狀之迹不能激昂奮迅自求所以比數於人亦已久矣
故深欲車推而綆汲之使不至留礙沈溺乃持其姓名
覬有聞於朝廷之上而且謂其亦可以施用於當時者
某蒙德之厚將何所有以謝公如此之貺於門下者哉
某不勝喜懼交集彷徨展轉之至伏念某出於孤賤資
品殆不能及於中人學進士本無望遂至於顯榮止欲
求升斗之粟尺寸之帛以免夫終歲饑寒之患不幸天
與之性使之簡介而專僻於人事殊不通曉常自顧其

中枵然無它竒才以求知於人斂嘿羞畏固未嘗敢輒
一開口問寵官要人丐少餘論執之以為進取之階從
讀書應舉及第守官以至遷改資序召試館職皆以在
上者之人見愛謂某所行道途後日當必至其所至之
地乃相與極力牽挽僅能致如此之今日雖然所獲能
幾而已似夫不可當得十年之中罹禍難被困苦蓋濱
於顛隕蹙踣之危者實屢矣昨蒙除恩粗得試守此郡
正謂居明公提按之下殊不敢儕於隸人有斯須自便

之懈循大端畧冗目擊豪暴撫柔良如是焉而已矣且
欲勉在賢人君子之側不使少有罷輒不職之過以取
煩於芘賴或至於不可留以為民之師帥又懼取煩於
啟上而斥去之豈謂某官以恢博之量通察之明訾相
官屬內辨良苦必以某底裏推縵甘守頑藐偃然自治
以安不肖垂哀下閔將洒濯而熏被之使焯然發光焰
出文采從學士大夫之後無或少愧某被賜厚矣言之
無由以殫其為感之心矣其如所以日念報稱於左右

者惟當飭羈勒鑣轡施鞭策就康莊而以事夫駸駸
不已者焉有阻趨瞻實增戀慕謹具啟謝謹啟

謝張度支啟

某啟近者伏承某官遠馳轡軒下歷敝邑傾望之始人
皆憚於嚴明按視以來衆盡蒙於寬假官吏識提綱之
體兵民忘持斧之疑才賢所臨風誼斯在竊惟布郡國
之政皆以分朝廷之憂然於察廉必用照恕有智力雖
短而顧無貪冒之惡有措置或爽而能盡公忠之心至

如決罰微涉於笞杖之差區撥略失於闕移之緩整比
未稱占對稍愆此乃衆人常情庶事末節若次第皆指
以為罪則煩碎下無其所安須存其權使盡乃術伏惟
某官治已以禮示人不疑通達以該乎物情文雅以飾
乎吏事凡閱諸目止求大端但觀為治者何如其人曾
莫更問其至小之過深副上詔大懽羣心某退自省循
實蒙存錄惟堅其守用塞所知卑情無任感忭激切之
至謹奉啟謝不宣謹啟

謝張提刑啟

某啟近者伏審提刑郎中不以某無狀持論薦於朝廷者承命悚愧處之不遑竊念某生於遠方世事眈眈稟賦不厚諸無所長止好讀書幸輒登第間闕二紀患難百端雖通籍朝閨隸名儒館而自顧不肖常甘退藏向得此州實滿素望驅勤飾拙僅以逾年至於簿書紛叢獄犴煩瑣丁寧區撥翫曲辨明摧屈姦頑撫字惇弱未嘗一日敢懈於公謀免過尤恐負除委心勞如此才短

奈何豈無不然上達有位伏惟提刑郎中取人無備接
下以寬不職之愆過蒙覆護非次之舉復為翦揚荷所
眷存敢忘報稱惟期勉懋用答獎知限守麾符阻趨墻
闕某無任感佩慚忤激切之至謹奉啟謝不宣謹啟

謝田京待制啟

右啟昨侍燕坐親承誨言心相矜存意在推挽荷德之
重撫躬而榮竊念某稟生甚微為學差晚勉道不至強
文非高偶塵賢科遂去民籍一命佐府止安勤愚三年

歸銓幸免愆曠比調藩侯之幕獲依臺使之庥赴官未
期託跡於是此者伏遇都運待制持斧按部驅車過州
例叅羣名進拜崇采接以溫裕已被寵華之深憐其單
平復形恩意之厚退念所守何堪其承再惟顙蒙本喜
論譔公有奇節時方盛傳止能竭豎儒章句之微撫賢
者忠義之實會以逸事張之累篇或播之於樂工或附
之於史氏歷世茲永大名其新惟持此懷庶答乃惠

謝都運傳諫議啟

某啟伏蒙聖恩授前件官已於去年十二月二十九日
赴上訖莫府承察已編吏瑣嚴臺取庇謹佩官箴省已
枵孱側身悚覲伏念某處地遐絕託宗衰寒易業耘芟
嚮銜鉛槧專尚以學妄追原流偶程其文謬玷科選既
策足以從仕遂刻心而首公願殫勤愚儻稱恩遇向官
西鄣幸逃過尤此官南函誓謹名節然而賦守推滯云
為拙蒙深繫賢明大與寬假伏遇某官德厚而載才高
且通接物於誠待人以恕西道籍用簡君相之憂列城

承流聳士民之望某幸以眇迹筮於洪庥當祈台光有
照隙漏止營寸効仰報全仁某無任喜懼激切之至謹
具啟謝干犯崇重伏增戰越不宣謹啟

轉官啟

某啟考績中臺叨奏成於吏効引名便殿獲序進於朝
倫服寵命以優榮揆孤衷而悚越竊原夫歷代之典最
重者太常之司有虞之隆兼禮樂者秩宗之任惟周之
盛次天地者春官之聯其後取名各殊定品尤貴於以

表國家盛大之義謂其練朝廷沿革之文既為之卿也
總正其端原又設之丞也攸助其區處苟非達聖作明
述之奧辨功成治定之宜識無不通才有可議則何以
槩隸此局濫塵厥官就失慎於選掄是輕蒙於稱誦如
某者出在遠蜀生於窮閭自曾高已還而未嘗服官因
文物之盛而輒自嚮學性饒挾以非穎文支離而不工
偶叨薦書獲寘仕版贊佐兩郡周回十年上官交章謂
其可以任使本部按詔乃曰當乎敘遷有持所得之科

名為引久之恩例銓啟上列宸音下俞超居衆前使
異平選逮趨雲陛之對親邇天顏之臨錫之恩章命以
通籍乃署此職以榮其躬何不肖之賤生受常存之要
秩迺幸孰與其緣有來此蓋伏遇某官平誠接人用恕
及物凡在顧矚悉生輝華剔鏤枵液而冀成美材鎔鑠
堅頑而使就利器茲所蒙被實由翦揚退惟孱冥粗識
依嚮某敢不夙夜自敕起居弗寧率道而行徇公以處
貴少收於治最勉後報於恩仁心所記藏書焉簡漏卑

情無任感荷激切之至謹奉啟謝不宣謹啟

上知府吳龍圖啟

某啟仲夏毒熱伏惟某官尊體動止萬福即日某蒙恩
伏念某違去左右倏焉三月嚮慕旌榮發于夢寐候問
之簡念常愧仄實謂明公愛恕臨下須煩寵答所以用
此有如情略仰計崇量曾莫垂責伏惟鎮撫方面安靜
如堵暘雨時節稼穡登楮善良伸展姦豪屏縮治蜀之
績轉聞久矣惟虞鼎席之缺即下鋒車之召西南民吏

求借不得某出入門下十年於此被顧良厚實越倫輩
今復試守支郡獲依使比蒙賴台照日晞光談敢不夙
夜思慙厥職上報大君之殊惠次酬明公之優眷符守
所拘阻趨嚴屏乞上為宗社精調寢餼某卑情無任系
戀之至謹奉啟上問台候不宣謹啟

賀昭文文相公啟

某此者伏審昭文相公寵被明詔召還宰席朝野之士
揖拜相賀誠以相公器度識畧實冠流品洞明前世經

權之會探究當今治忽之體用之於文則修舊起廢而
倫理備施之於武則翦暴除亂而姦宄息有惠利以浹
民之骨髓有勲烈以載國之旂常窮涯缺隅孰不瞻系
而一旦在外頻年不歸雖有美化止及乎一方實使重
望久虛於四海皇上懷眷舊德企渴嘉論亟下宸旨以
促其入追復正治易如指顧方今四夷未甚率服百姓
未甚富庶陰陽未甚調泰稼穡未甚蕃衍相公登庸羣
議欣洽感動和氣煙霏雲浮熏蒸悠颺疵癘皆愈太平

之遇期在旦夕天下幸甚某早荷存顧無所報効側聞
休命跳地而舞伏限官守所拘不獲奔詣左右某無任
喜躍之至謹奉啟賀不宣謹啟

獻文字啟

某啟某荒閭鈍呐幸庇迹於麾下以某嘗用文字進取
科級以某官有重名于當世復仗使節臨按其上固宜
整緝舊學蚤先諸人以獻左右為下吏導名姓於上官
之禮然猶省慮忖審欲往而復却者二年于茲矣無他

實謂本期用此以求一顧之惠或懼惡其蕪雜蓄亂聽
覽反獲投棄之辱職是故嘿然者久焉今歲官滿有旨
召試在函蒙蔭局事甚簡時亦強自搜剔營新補故聯
比綴次以備其事雖曰無取詎敢藏匿今輒繕寫古今
雜著共二編上塵台几裁制之暇願賜披閱可進可止
唯俟嚴教干浼威重無任戰慄之極不宣謹啟

丹淵集卷二十九

謹案卷二十五第八頁前一行短長鉅細刊本鉅訛矩今改

第八頁後一行彼王戎王洪之墨黷刊本戎訛或今改

卷二十六第二頁前七行而枕第樂於寢者刊本第訛筭今改

卷二十九第九頁後五行止求大端刊本止訛生今改



總校官庶吉士臣侍朝

校對官檢討臣龔大萬

謄錄監生臣李士勲

謄錄監生臣朱懷玉

欽定四庫全書薈要

集部

丹淵集卷

三十三
三十四

詳校官助教臣常循



欽定四庫全書薈要卷一萬四千八百十八

集部

丹淵集卷三十

宋 文同 撰

啓

謝趙龍圖舉自代啓

右某啓近見本州進奏官報狀竊承知府龍圖舉某自代者心隨驚飛汗與愧落自已不稱人其謂何伏念某氣識甚蒙材品至下毓質辟陋逢辰盛明起地讀書變

家登第袞袞從宦斤斤勵躬唯循廉隅敢越涯分進隸
儒館蓋緣科名累遷郎曹實用恩例曾不僥競重防詆
訶高尋前人下遠浮俗半通五兩得每自安數粒一枝
居無別望幸官鄉郡竊託使麾事親之心大恐不至好
古之道深虞未淳豈謂某官愛其所存忘是不肖因遷
美秩遂啓中宸謂某竭力慈闈行著鄉里玩心聖壺譽
高儕流退謂不如引而自代某愚何者公意乃然大雅
所為固云謙抑小人當是能不悚兢念蒙此章將底云

報唯當益謹素節上酬深知限守詔條阻趨麾戟引領
門下無任感佩激切之至

謝館職啓

伏蒙聖恩授充前件職者程文禁林幸被詔寵列職秘
館謬叨恩榮度衷枵屨撫已慙懼伏念某出自遠蜀生
於窮閭逢時之文從事於學性自樸鄙才非淹長吟磨
簡編力不逮古撰綴辭語強無由高名聞寂寥跡緒奇
蹇退守舊業田園皆荒進干榮途道地愈遠嚮繇選藝

閭里偶塵薦書赴召殿廷誤中科級是後更佐兩郡行
周十年近緣公章入改朝序尚茲僭妄敢爾僥希攀援
前人引列著令愚悃上達宸音下俞委之耆儒較以舊
學並取者衆獨知最艱洎試淵題加多穴思小平未進
靈氣已消大匠在前汗顏不止飛景將入蕪音僅成機
杼不工痕疵固滿猥當奏覽常待報聞敢期清流亦用
微品竊謂圖書之府英雋所躋亡似而居有覲其面靜
惟之致良有所階此蓋伏遇某官獎育微才推揚介善

言辨臧否人為重輕眷茲單平陰所提振是致懦品亦
升華階惟精乃心以辦厥職庶酬已目無玷恩陶卑情
無任感荷激切之至

謝提刑度支啓

近見本州進奏官報狀伏蒙提刑度支舉某不次擢用
者無狀之人本自甘於散外不訾之舉期特畀於褒陞
被眷優隆省衷愧負伏念某生地至遠如人且微起家
學文擢第從政殊無才術之可用但守勤愚而自將圖

書之淵謬陪於俊茂禮樂之府竊玷於班聯居常懷慙
敢自謀進嚮以親聞之便得茲鄉郡之歸職事勤迷廩
食尸素幸諸公之在上顧匪人而若存無責其瘵重為
之地此者豈謂某官大與比賴陰相薦論謂宜召還不
次擢用施此眊眊屬之孱庸慮聞於他或議其過斯蓋
某官常賜延納屢交語言察某之性椎鈍而少文揆某
之心斂默而畏動持此之見抗然以言況如某之所為
實在時而不肖既不能激昂以取夫榮耀又不能潛伏

以休於幽深徒容其身以累於世然而伯陽所尚者知
止仲尼之與者有恒仰惟高明用此采錄敢不益敷素
節勉尚清修惟堅所為以俟其報

謝運判舉陞陟啓

伏審運判職方同具保舉某不次陞擢者聞命之初撫
躬而愧竊念某生無肖似起自單平偶然讀書遂爾登
第止知公忠清慎曰涖官之本不能矯曲儉媚効隨時
之為用諸公之薦而升朝闈蒙先帝之名而入文館常

淡厥進以安其愚兢兢自持默默無競向求鄉郡視寢
親闈得比公庥已深天幸運判職方一見如舊二年于
茲故常掩覆其不能未始督責其無狀已荷寬假敢期
薦論茲佩德之至深復何言而可謝唯將愚節上答已
知卑情無任 云云

謝成都府尹并三司啓

近奉臺移俾承郡乏已茲涖政常爾兢兢懷伏念某學術
非深才具至短其資選懦所向拙方為治中之官殊恐

不職行太守之事固非其宜然而一紀之中三來於此
事體素習民情相諳雖若偶人之臨猶為編戶之信止循
舊貫敢立奇名但勤學製之工庶免代庖之醜惟煩厚
庇以保孤蹤引企門闌某無任系戀

云云

謝府尹并二司啟

嚮者領帥府之召置校財簿之虛盈留連幕中將逮一
期之滿出入門下何啻三日之疎威采霽上官之嚴文
儀簡屬吏之禮曾無督責常與撫存凡燕游之地許其

來從有詞章之事多以見屬仰被慰錄他無間言某自知非木石之頑公垂眷有丘山之重事已還治心焉嚮仁前此違離實深感愴此蓋某官神襟浩粹德量淹宏扶持草茅毀去崖岸周旋接下不以勢力而自高款曲推誠蓋存信厚以相待遂使庸妄居常傾依里堠裁一昔之行門闌若千里之邈惟勤周闕

庚伏在週秋嚴

漸邇伏乞上為宗社精調寢興某卑情無任

云云

謝夏宮苑啓

右某嚮聞幢節之行敢用竿牘之獻以道榮幸得依美
麻豈期照存忽賜還答顧此孱陋當之悚兢此蓋知府
太博蚤相矜憐厚自謙抑禮鈞於下情感於中即斂迹
以瞻依但盈懷而聳躍卑情無任佩荷之至

謝宋國博啓

伏承某官寵被宸恩榮闕郡治側聞休命竊抃鄙悰將
馳慶牋以謝芘覆載領珍牘何勝悚兢伏惟通判殿丞
資猷敏明操履沉厚久從仕治夙著官稱嚮疇邑課之

殊茲貳藩條之重車音未及輿意相歡某幸以瑣材獲
依巨蔭臨風以企與日為深卑情無任感荷抃躍之至
謝慶州焦推官啓

右某伏審較能省部贊畫戎藩修禮未遑飛文見及蒙
此厚眷惕然鄙悰伏以推官秘校儒術通明吏事彊敏
蚤伏士論尚淹賓筵署事云初先書以貺過相存錄深
用感銘未遂瞻依所期將護謹奉狀賀兼謝

謝寧州雍屯田啓

右某忝名鄉闈幸密壤土蓋用晚末未由趨瞻常傳風
徽自益景慕向題輿之道此獲斂板以拜前傾聞話言
慰滿志願邇消辰而署職先屈禮以飛文過為謙沖重
俾慚慄恭以通判屯田履尚端潔襟期粹和待人以誠
納已於道居贊貳之秩尚鬱於美才用薦論之章即陞
於清貫其所系賤局甚遙高軒深希保調用對旌寵卑
情無任企望之至

謝夏宮苑啓

右某伏審顯奉宸綸榮持郡節凡叨巨蔭舉集驩悰恭
惟知府宮苑太博世襲公忠天資毅勇才明以斷德厚
而溫屢更軍律之雄進領使權之重時惟景服上所眷
求護苑丘之兵已聞竄入布幽國之政實自選行茲承
治裝匪遠戒道同幸以蒙懷獲居庇存瞻趨有期企聳
以俟某無任系望欣躍激切之至

謝三泉知縣贊善狀

右某此者祇膺朝檢移領郡章已試薄才輒臨庶務方

馳誠而往謝忽遣介以見存伏惟某官出忠孝之家稟
禮義之教夙成懿德休有令名尚綰邑符固淹輿論下
眷僻藩之守特修鄰士之歡佩荷惟深紀銘曷盡謹奉
狀謝

謝諸郡啓

右某忝奉邦恩俛臨郡治消辰以吉視事云初退省已
以無堪實懷慙而甚厚心之所恃賢者相依幸託庇於
隣城敢晞風於懿範某官志勤育德義切成人儻拙政

之有聞願美言而見教感所磨礪存諸鏤銘尚遠瞻趨
徒深跂引

謝韓少卿啓

伏審榮奉制音寵移漕命郡縣聞此吏民驩然恭惟慶
慰伏以運使少卿性稟淳明才周敏給自厯揚於美仕
皆夙著於休庸有忠績上簡於帝心有惠術下充於民
望蜀之列部太半被於矜存邦之要權未幾聞於召用
西南為地漕運須人豈無餘敝之未安即見良謀之盡

講某猥臨支郡託在洪庥雖勉居於千里之封實徵幸
於二天之庇限居守印阻謁使旌引望車塵敢通郵訊
云云

回蜀州王郎中啟

親老待養求侍於慈闈君仁推恩許臨於鄉郡至官以
近屬事之叢常欲為諸公之書謝所不逮卒未有少時
之暇致之無由靜念稽違深懷悚戢敢期存齒之厚特
往封騰之先乃眷甚隆其謙益至伏惟某官全守正重

端持公忠自歷榮涂皆揚顯譽而能敦獎士之節厲樂人之風雖此么孱亦蒙顧與布詞以麗將意其勤荷德殊優為顏已厚正嬰官守之冗阻奉賓從之遊引首使麾無任企向

云云

回嘉守楊郎中啟

向者某官持節為州驅車過郡獲瞻符采甚慰久傾之勤款奉燕談益資寡見之陋遽爾去德缺然為書視禮之疎撫躬而愧邇承撰日榮此臨官將効馳誠先蒙賜

教厚自降接雅存謙尊某官冲量粹溫令猷淹茂文章
貴系簪組名家茲假長才屈為遠守方成踰月之政已
布載涂之謠伏冀勉輔生經寵綏多福

回郭公博德容啓

伏審被中宸之恩進上庠之秩聞命將慶貽書忽先蒙
禮見存揆衷且愧某官稟才端厚挺質粹溫早歷榮階
洊著休績茲膺帝渥實獎年勞未獲瞻依豈勝係戀

回彭守鮑郎中啓

伏審某官被命作藩洎辰視事將馳慶幅先墜華函雅
意謙沖鄙懷慚懼某官寬裕宏偉端方勁嚴蚤著殊能
薦揚膺仕惟天彭之古郡乃井絡之名區民俗淳和壤
土饒沃訴訟甚簡幾至於鞠扉教化易行豈煩於餘刃
將疇善課即見褒遷咫尺壇坫睽遠風度敢祈葆毓以
慰傾瞻

回茂州吳郎中啓

邛州

聞風舊矣奏記缺然嚮服才猷徒傾於翹館輸馳懇素

莫置於行郵使由奧屏之來惠有榮函之及布詞且麗
將意甚勤某官學有本元術兼權立向繇劇邑選委遐
藩蓋憑綏輯之才果布循良之政即程懿績就服褒恩
某仰德雖深涖官有制未諧會晤常積瞻凝

丹淵集卷三十

欽定四庫全書薈要卷一萬四千八百十九

集部

丹淵集卷三十一

宋文同撰

啓

謝提刑張郎中啓

伏審提刑郎中奉被榮恩按平祥憲西南列部上下交
懽伏惟某官器度淹闊資猷敏給奧學洞羣經之本高
才通庶政之宜家傳文章世仰方格豈獨推於人望固

自結於主知朝廷之慮者寔在乎遠方郡縣之患者恐
失乎中典當從讞正乃屬賢明嘉命初聞輿情已愜某
幸茲守郡獲在提封顧蕞陋之微材託均稯之厚蔭限
拘左印阻詣前旌

謝韓運判啟

右某近蒙高軒遠按下郡地既僻陋事皆因循某向此
臨邛比裁閱月雖常整輯尚未安完以至簿書迷甲癸
之行倉庾亂新陳之次運判都官持心近厚垂意見存

和顏相臨溫語下逮譏訶免於羣掾敲扑逭於諸胥重
煩文移勤與教示某乍茲試守竊已蒙休始常懷罷輓
之虞終實荷蓋藏之賜感銘斯極跼蹐無忘

謝提刑張郎中復官啟

右某近服新恩再居舊秩曲臺議禮既失於討論重屋
奉祠亦霑於敘用久負寡聞之恥忽叨洪沛之榮受命
云初仄身無所蓋此官凡經於三拜故為謝慙致於一
辭豈謂提刑郎中猥賜存憐重垂褒借念歸華省謂所

行之例當然喜動沖襟見相愛之情如此敢期部使深
顧州僚謙固已而有之禮待人而厚矣心之所感言不
能殫限領守符阻趨賓閭

謝梓州知府大監啟

右某伏審知府大監榮持使節出總藩條爰自下車逮
茲閱月政已成於樂易頌皆播於中和九重擇人一境
蒙福恭惟知府大監德由世積學有師傳性厚以通才
高而敏踐揚仕籍該練政經所臨之地則民實宜焉凡

建之功則上皆信矣泌陽美績與古相參蒲坂休聲至
今為盛惟是左川之重寔為全蜀之雄聊藉撫綏庶安
遐遠即聞迅召別委要權某占藉提封領麾僻郡文移
冗密訊記稽違當遑譏訶但深忘茹儀未伸於邑子心
常系於邦侯限佩守符阻趨賓闈某無任聳慕激切之
至

謝鳳州都監供奉狀

右某去國十年守蜀三郡居常渴德坐失為書此奉疾

郵之來忽承累幅之惠過蒙存錄深負悚惶伏惟都監
供奉才辯而文性和以毅向聞註誤偶滯騫翔賴昭洒
之既明當選掄之甚適勉期善養用對優恩瞻晤未皇
企延徒切謹奉狀謝

謝西鄉西縣中舍狀

右某近被中除猥遷前列豈謂眷存之厚特形慶賀之
深感佩良多摛裁罔既謹奉狀謝

謝提刑學士

右某近者伏蒙某官特迓盛節來按偏州磴道崎嶇春
泥險滑屢涉郵亭之遠頗為車騎之勞然幸瞻依實虞
廢弛況茲褊陋久曰因循雖自勉於剴裁但未安於稱
媿此者某官究詳所治霽抑其嚴尚相嗟憐不賜譏責
豈惟無狀獨承故舊之矜存以至羣僚亦有依棲之蒙
賴拜違未幾系戀良深限守郡城阻趨臺府卑情無任
感佩之至

謝運使按巡狀

右某近煩使斧遠按州麾簿領猥叢網條焚弛重勞檢
詰悉免譏訶豈惟不肖之蒙休抑亦羣僚之甚幸此蓋
運使少卿寬於臨下誠以接人念其間有所未周蓋於
理實亦可恕使新後効與霽嚴威高軒遽還畏途正熾
計神明之所佑想福履之尤嘉某限守郡符阻趨賓閭
其諸感佩莫盡宣言謹奉狀起居兼謝謹錄狀上

謝運使司封啟

右某啟近者伏承運使司封為某發狀言於朝廷乞賜

召還者無用之才本自流落不訾之舉遽辱薦揚伏念
某推縵不文孤平少與初登仕版便圖行已之見聞屢
析藩符專務究民之利病頗聞治狀未至乖方用此免
衆人之見譏因而獲上官之垂眷伏惟運使司封學問
深博資猷敏明以忠直自信而曾不他求其職任所來
而皆因上選按臨本道旌別屬僚豈期樗散之頑姿亦
玷袞袞之華牘蓋膚美之使凡見善而必收而庸常之
人宜何事而可報惟堅素節以副清言荷德非輕引詞

安盡下情無任喜懼激切之至謹奉啟謝不宣謹啟

謝成都運判太博狀

右某伏審被宸扆之褒章領漕臺之副節嶠嶺之下豈獨幸提封之吏民涪江以東實大慰同黨之親友用才而當聞命皆歡伏惟運判太博蚤有令名共推遠器學問淹博才謀敏明歸按新書已馳平允之譽上陳美績果委將輸之權恩除初行衆望殊快何未遺於鄙樸忽先辱於音題佩服謙辭銘藏陋腑未皇瞻晤徒切傾依

謹奉狀賀兼謝謹錄狀上

謝成都端明因上任

蒙恩授上件差遣已於今日赴上訖親老切於侍膳
累求便官君恩許其還鄉得佐支郡茲服嚴命已臨賤
司伏念某生也至孱學焉甚陋偶時之盛從事以文謬
緣賢科竊迹秘府嚮嘗遂外官之請尋用持先子之憂
一居家山四改歲序有母八十重遠於慈闈去國三千
難歸於儒館敢圖就養輒以抗聞人賤言微天高聽邈

中旨敦迫羣章薦論既而還臺復爾叩閣屬聖君之孝
治體人子之勤誠會此空官俾之承乏今侍親輿之至
即書吏版之中伏遇某官德量粹淵端誠愛恕秉持重
節考按諸城退省懦庸實繫比賴唯全素守以逭嚴訶
謝主簿任通夫啟

伏審向者召以一封之車試於四禁之地蔚矣奏成篇
之上霧馬蒙疏渥之榮光輝朝廷聳動鄉里伏惟某官
詞章豪蕩學術深明久馳不偶之稱忽應特招之選果

升官牒甚慰輿情不遺鄙樸之微先賜緘牒之重私心
至喜厚意難忘

謝人移厨

伏蒙某官特枉使牙遠移公饌仰荷眷存之厚敢忘負
荷之深即俟趨依併伸悃悃

伏蒙某官慰道途之勞垂肴醕之賜下霑僕乘益感肺
懷

伏蒙某官遠枉使厨薦臨客傳感領重意銘藏鄙懷

謝知興元府啟

右某啟閏七月二十日進奏院遞到勅牒一道蒙恩就
差某知興元府候成資日赴任者某羈輸私悃上瀆公
朝音驛既行實懷憂於重謫詔綸忽下果見聽於愚誠
不圖猥瑣之才薦委藩宣之任叨天若此為地有緣此
蓋伏蒙某官稟德寬容遇物愛恕所部之吏勿盡責其
無能不才之人亦蒙休而自免所以拙者為郡庇之逾
年曾無譴劾之聞復有薦論之重寔由覆護致被寵靈

謹當愈勵操修庶符補塞限嬰守紱阻謁使旌卑情云云

回邛州劉駕部啟

近貢柔函已通燕几念封圻之咫尺承晤語以差池仰
德之深與日而永府吏至止騰音見頒荷眷錄之殊尤
增佩銘之稠沓竊惟尊履常擁神休某官游歷榮涂皆
聞懿績比殿西南之服已彰畏愛之能即竚寵褒更膺
華擢某向叨交政輒貢願言

回新知郡韓郎中

漢州

伏念三泉之別一紀于茲抗俗走塵屬間關於末路攀
鱗附翼致契闊於高風屢嬰出處之煩久廢起居之問
瞻企晤語怕勞歎悚某官上奉宸衷遠持使節鎮臨要
部綏撫遐疇驛信先馳輿情甚愜某便安親養佐貳藩
條未皇裁書以上瀆賢明先辱賜教而俯慰蒙陋荷眷
之渥銘懷呂深伏計涓時日之良整徒御之盛然行遠
道方在清秋更希偃昌之勤少護寢興之節傾依匪邈
扑蹈殊增

回綿州知郡啟

膺右掖之制守左綿之符已涓良辰方布善政當駐麾
於劇郡屬泐檄於它州不時為書以賀視事正深慙悃
忽受謙題仰佩眷存寔銘感戢某官負才敏給稟質清
淳自揚歷於仕途悉著明於治迹適承宣化盛已傳謠
某以賤局所拘不獲云云

回漢州四縣官啟

持懇聞上請官便親尋蒙詔章許倅郡事冒據貳車之

委慙當聯邑之先吏指繼來書音見屬相存者過所示
彌沖某官業履有聞才術兼茂乃心當國其志在民尚
呂吏衡之拘猶為縣道之屈匪人甚幸賢者在茲交期
有涯瞻曾伊邇

回綿倅萬職方啓

此者猥膺宸綍叨佐郡符垂組過家誠當於素志侍親
從政尤慰於私衷竊尋忝幸之殊概出揄揚之始屬窘
他故未輸短懷豈期眷沖先墜音訊某官曲敦惠好高

喻襟期馳伉步以及門義歸款密側微躬而戴德心切
銘藏拜賜猶賒嗇神為祝

云云

丹淵集卷三十一

欽定四庫全書薈要卷一萬四千八百二十

集部

丹淵集卷三十二

宋 文同 撰

啟

賀延州經畧待制啟

右某伏審榮奉制函進陞延閣竊惟建廣內清切之地
於此藏真皇制作之文厥初命官最號盛選自匪稱職
寧容濫居恭以經畧待制全文武之才洞天人之學嘉

言謹論簡沃清衷密畫沉謀震懾醜落爰登禁近之職
實副詳求之心某久荷眷存遠形抃躍未由瞻倚徒切
傾翹云云

賀運使學士啟

術業通明器宇凝厚優游華貫馳騁重名忠義有先正
之風才謀當廟堂之眷嚮居諫首言聳動於本朝今總
漕權課殊尤於道左

賀成都知府資政啟

右某伏審換平涼之使節分右屬之戎符夷落騷邊敢
煩於我武朝廷命帥無易於公賢豈惟紓北闕宵衣之
憂實以免西州塗地之患列郡仰止聞風驩然恭惟判
府安撫資政宗廟笙鏞明堂柱石高文大冊蚤冠擢於
賢科奧學淵謀久參陪於國論出入更乎二府休戚繫
於一身雖均外官常簡中眷屬坤維之絕徼有汶嶺之
孤城妖寇跳梁重搖遠俗銳兵翦撲當委宗工即聞區
處之行旋見蕩除之報西南所慮指顧而平某假守偏

州隸員屬部限嬰短絃阻拜高牙某無任引系激切歡
愉之至謹奉狀賀謹錄狀上

賀提轉冬至啟

右某伏以氣應黃宮灰飛緹室義經示卦復其見天地
之心吕令謹時靜以待陰陽之定賢明所履福祿其宜
伏惟運使郎中道義深淳文章粹美宜爾付絲綸之任
尚茲持金穀之權行業有聞神靈是佑諒乘佳節克擁
殊祥某限以官守所拘不獲詣前為壽

云云

賀利州知郡虞部啟

洋州

右某伏審重膺堂帖榮易藩符顧惟才力之高實協輿
言之允恭以知郡虞部文章俊裔忠孝名家揚歷仕途
宣昭政績出於廊廟之論授以襟喉之邦僉言得人誰
復置議某嚮官漢上已忝鄰封今守洋中又同當道先
煩惠教過沐撝謙未遂瞻依徒深企詠云云

賀正鄰郡知通啟

右某伏念五始端元三朝表正陽和發歲已彰生物之

仁賢德乘辰茂集履祥之吉伏惟某官清淳稟質寬裕
凝懷自陞顯仕之途皆著宜民之績歷夫令序受此殊
休某限寓宅藩復拘遠道不獲詣前為壽但增祝頌之
詞謹奉狀賀謹錄狀上

賀冬鄰郡知通運提勾啟

右某伏以七日有期一陽云復信動於內物由以生賢
德所乘福履增裕恭惟某官立誠中正抱質清淳才大
業隆天相神佑諒涉佳辰之吉必膺繁祉之休坐遠門

闡無任虔祝之至謹奉狀賀

賀正益梓提轉知府啟

右某伏以一氣遞時三陽履旦歲元肇正厯紀惟新推
德為生盡蒙於幽隱儲仁曰福先相於賢明恭惟某官
端莊敏文敦愿寬懿挺秀時之具為康世之才獄犴攸司
多存仁恕神明所佑即庇休祥持金穀之權且資碩畫下
絲綸之命即見褒陞領劍外之雄藩最書屢上掌禁中之
密命舊物當還諒接天之新元必受國之重詔羣情仰

祝比屋同辭某限守遠官阻臨高屏其諸頌詠但此傾
翹

賀興元府通判禮上啟

右某伏審攷擇剛辰竭臨美任恭惟慶慰伏以通判秘
丞東南秀氣詩禮名家參郡務於蓬山已彰善績貳藩
條於漢水猶抑宏才某幸守鄰疆遠依巨蔭限嬰組紱
阻造階除卑情無任喜抃之至

賀提轉知倅啟

某啟元正令序伏惟某官乘此三陽之候倍迎百福之
休某限以守符不獲詣左右為賀下情但深祝頌之至
云云

賀蓬州楊簽判

某接鸞鵠之羣昔預九霄之侶簞鶴鴻之列今同一道
之官至此歷年自知啟倦役於多事殊失音題遽蒙啟
訊之先愧尤之甚敦隆契好度越儕流無似當之
不遑深矣某官同年才猷敏劬文藻適華四世三公遠

襲慶源之大一日千里早聞令譽之馳著籍朝閨僉謀
郡幕方在急賢之會即膺舉德之求某限守藩符阻趨
賓閨云云

賀東川知府朱少卿啟

伏承顯拜恩章出臨藩鎮洎辰布治與衆更新伏惟慶
慰恭以某官德重行方識周才貫聳朝倫之風望練政
理之本原棘位辨名中參九列之峻竹符分寄外殿一
方之雄遲舉化條散為民福某叨從別乘竊迹隣邦惟

是先廬得依大庇屬居官之有制顧授謁以無階瞻引
旌麾幾搖魂幹云云

賀利州王郎中狀

右某近蒙高旌前過敝邑迎候之禮一愧空無睽違以
來久失裁謝此者伏審榮臨會府盛布寬條吏民歡呼
道路傳播恭惟某官學有本末政知後先比郡聲稱游
揚正甚外臺薦辟施設尤殊即聞美課之陞行有褒恩
之及某限紆守紱阻集賓階引領崇閎云云

賀提刑司勲狀

右某伏審被明廷之詔旨按當道之刑書佳音布聞羣
論欣愜惟是中梁之舊域曾經太守之行春里巷相驩
吏民胥慶矧茲蒙顧之舊益用抃懷之深伏惟某官博
學精醇負才敏給持誠恕厚蒞事通詳藉夫正信之才
委以平亭之職提封之下治解所存某嚮詣賓階接辭
已幸今居使部承教當先日佇郵音前臨馬首卑情無

任云云

賀巴州知郡郎中狀

右某伏審宸綸就紆郡組褰帷入境撫几臨民某官嚮
輟藩條來參漕柄殊尤之績已當考最之書顯要之掄
即應陟明之典云云

賀提刑度支轉官啟

右某伏審提刑度支榮膺顯制寵進名曹凡託按臨之
休舉增慶抃之劇矧蒙厚眷實倍常情恭惟某官器業
自將風力兼茂充中以道炳外其文蚤在妙齡已著翹

然之譽薦躋膺仕衆推卓爾之才上心簡求衆論諧愜
右川重委方倚屬於讞疑左省褒遷復延登於主計用
雖未既恩蓋非常即聞奏課之尤當有任能之召某幸
棲美蔭良動懽懷所限佩守符之微無由趨使節之下
引領臺府云云

賀趙龍圖上任啟

伏審某官涓選良辰視臨美政居庥者衆竊幸焉深恭
惟某官道貫二儀才周萬變高猷映世亮節端朝會遇

聖神之知躋陞侍從之列蜀所巨鎮益云要藩上欲用
公詔煩為守鼎席如缺玩印而有求鋒車下臨趨節而
先起前是數相一新稚耄之瞻大布慈和之政隣城仰
式它道胥傳伏惟某官資稟端淳才猷敏劭仕榮揚歷
官最殊尤嚮題漢水之輿佳聲未泯今剖巴江之竹善
譽先馳方裂素以通誠忽憑郵而賜教眷存所厚佩服
良深云云

賀洪雅知縣陳秘丞狀

右某往年南岐榮治之下獲誦雄編去歲東蜀旅郵之中復傾高論心常景伏迹但睽乖而況處鄉闕甚密之鄰預牒籍同升之契故當無遂廢之書簡所恨有相違之宦途向者抗牘而屢請小麾幸此蒙恩而歸守支郡遽承占問之及良荷記存之深某官同年文章高於衆人誼行比於前輩治一同之地難乎盡展驥之才居四徹之山宜矣任和鈇之職即聞美召行踐華途未遑奉左右以周旋實亦望東南而旋倚願勤善養俯慰虔祈

何由瞻依用究悃悞

賀運判都官啟

盛世雄英華門嗣慶蚤奮深湛之學亟陞高妙皆從此
塗某茲處末僚自慙冗器日期大用願託巧陶所限繫
題輿之微無由伏齋几之下云云

賀正東川朱少卿啟

一氣遞時三陽履旦歲元肇正歷紀惟新推德為生盡
蒙於幽隱儲仁曰福先相於賢明恭惟某官端莊敏文

敦愿寬懿挺此秀時之具布為康世之才猷猗攸司多
存仁恕神明所佑即俾休祥諒接天之新元必擁國之
厚寵羣情仰祝比屋同辭某限守遠官阻臨高屏其諸
頌詠但此傾翹

賀懷安知軍轉官啟

伏審近蒙均恩榮進中秩伏惟慰慶恭以某官挺質高
爽持才敏明稟規賢門登仕聖世尚屈臨於遠國即召
置於華途此而榮遷漸以要用某幸隣善部阻拜崇墉

春輝正深道味益勝云云

回漢州郎中啟

近奉宸俞就遷州寄遽然拜命惕若兢懷某迫蒙朝廷
假守仁壽謂僻陋至微之郡宜迂疎不肖之人逮至此
時云為多故文移全集事目交紛行雖躬親處實迷誤
無偃仰棲遲之暇有喧囂倥傯之煩已幸報成猶虞罪
去念將滿歲當趣還朝轉徙有道涂之憂偈仄餘昏嫁
之累敢持愚懇渚扣嚴聰奏牘既行祇虞於重譴詔綸

忽下尋被於鵠恩以李固解綬之鄉為阮咸出麾之地
求雖有自得豈無緣某官素與鄉評陰加士論常見匿
瑕之美曲揚剖垢之光遂使孱庸獲叨除委更煩慶問
之賜益荷朋遊之深紬味妍詞銘藏陋腑未皇展晤徒
切翹凝

回漢州知郡啟

伏審近奉宸綸再留使節藉乃厚德慰諸羣心豈惟增
閭里之光抑亦重朋遊之喜某官託姿粹茂賦量淹宏

以儒學踐巍科以吏事陞峻秩還鄉為郡布政宜人是
故河內父老願借於寇恂淮平吏民爭乞於侯霸九重
是與千里相歡方議馳書忽蒙賜誨仰承眷錄深負感
藏

丹淵集卷三十二